



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7 Yangia anidakangma : [f](#) Tir Yimyim [tir_yimyim](#)

[tir yimyim](#) TAPAK 3

Bangladesh sorkari Awami League
nem tenokdangba agütsütsü

Odisha nung tejenokdak
800 renema lir: Minister

VOL. XXII ISSUE NO. 14 (ADOK 14) DIMAPUR RASEMNÜ (WEDNESDAY)

MONGPUTENI (OCTOBER) 23, 2₹ 5.00

FHRCC Oct 23 senden athir

Dimapur, Oct.22 (TYO) : Foothill Road dak sendakba ken o jembitsü atema NPWD ketdangsertem den senden ka October 23 , 2024 nü amentsü lateta liasü, ajisüaka Foothill Road Co-Ordination Committee-i akangba ama iba lenmang yangluba maparentem ya inyaka aotsü mulunga aliba department-i lemsatep nung

Senden thitemba atema sasar saka memenui anogo tajung ka nung NPWD den senden lia teinyaktsü inyakteptsü ta paisa metedaktsü.

NLA-i Oct 30 nü küm 60 benjung amongtsü

Dimapur, October 22, 2024

(TYO): Nagaland Legislative Assembly (NLA)-i October 29, 2024 nü 60 buba benjungmong amongtsü.

October 21 nungi Assembly telongtet nung merükmeju mapa tenzükogo aser iba ya hopta ka piyong inyaktsü.

NLA Speaker Sharingain Longkumer aser Deputy Speaker S Toiho Yeptoh nati

anir iba mapa inyaker.

NLA küm 60 ajungba benjung ya 'Embracing Innovation and Celebrating Legacy' omen nung ajemdaker amongtsü aser Governor La Ganesan den 14 buba Nagaland Legislative Assembly züngsem ajak adentsü.

Iba sentong nung taoba mapang MP inyakertem den tongti nisungtem aika adentsü.

Municipal Affairs Department-i building bye-laws tasen yanglutsü



Kohima, October 22, 2024

(TYO): Nagaland ya Seismic Zone-V nung lir aser alima lendong balala ataloktsü ana nung dang lir anungji state sorkari Building Laws tasen ka yanglutsü mapa inyakdar ta NSDMA nung Joint CEO Johnny Ruangmei-i ashi.

"Nagaland Bye-laws lir saka iba nung building codes inyakim sulen anidaka mali anungji Department of Municipal Affairs kubok luden ka tentetogo aser parnoki building bye-laws tasen ka yanglutsü" ta pai ashi.

Modi aser Xi na tang Russia kubok Kazan nung BRICS Summit nung adener. Iba sentong nung Russian President Vladimir Putin, Brazil President Lula da Silva aser South Africa President Cyril Ramaphosa nunger adener.

NEPEX agitsü.

Nagaland nung local building bye-laws maliba agi National Building Code benshir saka bye-laws tasen yangluba sulenbo kiburi tashi mangara common services magütsütsü. Building bye-laws ya nisung ajak ajungtsü atema lir ta Johnny Ruangmei-isa ashi.

"Nagaland Emergency Preparedness Exercise (NEPEX) ya kanga tajangzük aliba sentong ka lir kechiyong mezüng agidangbo line department temi pei teinyaktsü memetet liasü saka kumtem süia arudang tangbo department shiai Nagaland nung alima lendong atalokdang pei pei teinyaktsü kanga junga meteta kumogo" ta pai ashi.

Taküm NEPEX ajanga Nagaland tarutsü atema resilient infrastructure aser economy lir ta Joint CEO Johnny-isa ashi.

"7 buba NEPEX atema Indian Army, National Disaster

Management Authority (NDMA) aser tanga State Disaster Management Authorities (SDMAs) nungi Observers arua lir" ta paisa shisem.

"Menoknok anoktsüba ya memeteter anungji asenoki takoksa aser teraksa ajemaktsütsü atema renema alitsüla aser NEPEX nung iba ya kanga tongtipang lir" ta NEPEX 2024 atema Lead Coordinator aser National Disaster Management Authority nung Senior Consultant (ME & IRS) Maj Gen Sudhir Bahl (Retd)-i ashi.

Alima lendong balala atema municipal department-i tongti shilem agitsüla aser medical, fire & emergency o PWD department tem dena sendaktepa alir ajaki renema alitsüla, ta pai ashi.

"Nagaland nung building bye-law shitak yanglúa ayutsüla" ta Maj Gen Sudhir Bahl-isa ashi.

Startup Nagaland & Tally Solutions sendakteper



Kohima, October 22, 2024 (TYO): October 22, 2024 nü Commerce Director P. Tokuhaga Sema aser Tally Solutions Pvt. Ltd. Chief Marketing Officer Jayati Singh nati MoU nung sign sütep.

Iba MoU ajanga local startups yaritsü aser online o in-person sessions ajanga shisatsü agütsütsü. MoU ajanga Nagaland nung Startups-i financial management, operational strategies, marketing techniques aser compliances angazüksü.

Tanü Directorate of Industries & Commerce, Kohima nung Industries &

Nagaland nung nisung aikati AYUSH treatment agir

Kohima, October 22, 2024

(TYO): AYUSH hospitals aser centers ajanga Non-communicable diseases noktangtsü osang prokshir aser mozü agütsüba dang masü saka shirangertem dang exercise ajanga temang anema alitsü ajungmesor ta Deputy Director AYUSH, Directorate of Health and Family Welfare Dr. T Bendangtula-i ashi.

100 days of Ministry of AYUSH atema osangbener senden nung jembidang "Ayurveda, Yoga, Unani, Siddha, and Homoeopathy (AYUSH) ya ajak ajangzüksü asoshi tongtipang" ta Dr. Bendangtula-i ashi.

Tesüiba nung nisungtemi osang tejangja memetetba agi AYUSH treatment agitsü memulung saka Ministry of AYUSH tentetba ajanga nisungtemi iba treatment agir, ta lai ashi.

Integrated AYUSH Hospitals aser Health & Wellness Centres

nung angati anepaluba aser mozü agütsüba dak alia physical instructors lir aser parnoki diabetes, pressure, cancer aser hypertension amala Non Communicable Diseases anepalur, ta laisa ashi.

"Nagaland nung AYUSH doctors 142 lir aser parnoki Integrated AYUSH Hospitals 3 dena AYUSH centres 49 nung mapa inyaker. AYUSH centres

nung herbal gardens lir kechiyong mongintemi Nagaland nung medicinal plants 1500 tema bushitetogo" ta Dr. Bendangtula-isa ashi.

"Prime Minister Narendra Modi lenisüba kubok Ministry-i traditional medicine systems tashi itdaktsütsü meranger aser India ajungalen quality healthcare tajungba kümdaktsür" ta Regional Ayurveda Research Centre, Dimapur nung Research Officer In-charge Dr. Vilas Gangurde-ashi.

Ministry-i linük ajungalen Ayush-led health camps 14,000

ayonga agiogo aser iba ya anogo 100 tsüngda 10,000 camps alizüng ayuba den teimba lir ta pai ashi.

National Accreditation Board for Hospitals & Healthcare Providers (NABH)-i Ayushman Arogya Mandirs 1,489 asadangogo aser iba nungi 1,005 nem Ayush Entry Level Certification agütsüogo, ta Dr. Vilas-i ashi.

AYUSH Ministry-i Vietnam aser Malaysia den Memorandums of Understanding nung sign sütepogo aser iba ajanga medicinal plants aser Ayurveda wadang nung yariteptsü ta paisa ashi.

Ministry-i Ayushman Bharat-Pradhan Mantri Jan Arogya Yojana (AB-PMJAY) kubok Ayush packages 170 bendenloktsü renemogo aser iba ya national healthcare system nung Ayush treatments sendakteptsü atema lir ta Dr. Vilas-isa metedaktsü.

MP S Supongmeren Jamir-i BSNL State Headquarters semdang



Dimapur, Mongputeni/Oct. 22 (TYO): Member of Parliament (Lok Sabha) S Supongmeren Jamir-i October 22, 2024 nü Bharat Sanchar Nigam Limited (BSNL), Nagaland Branch, State Office Headquarters Dimapur semdanga General Manager, Masharib Gul Mufti ITS-i anir ketcangsürtem den sensaksem agia liasü.

Sensaksema mapang BSNL ajanga Telecom network coverage kubok mesüaka state nung tesem balala nung connectivity agütsüsü atema meranga inyakba indang General Manager Mufti-i lemsatepa liasü.

Iba dak sendakba nung parnoki Department of Power Transmission

Telecommunications, Ministry of Communications indang Universal Service Obligation Fund (USOF) kubok Telecommunication Towers 555 amenoktsü asoshi project agüja aliba indang ashi, koba ajanga meta talangba nung aliba consumers nem connectivity agütsüsü.

Mufti-i state nung district asem dak alaka tanüngba nung optical fibre cables (OFC) connections maliba indang jembia liasü aser data transmissions tekeraba, tajungba nung amshitetsü atema Telecom Towers tem fiberisation asütsü tongtipang lir, aser wire data network ulushitsü atema High Tension

infrastructure amshitsü atema Power Department, Government of Nagaland den temaba jenjang nung jembishinu akaba mapang lir, ta ashi.

Optical Ground Wire (OPGW) cable medium ajanga data transmission agütsüba nung state kubok district tali pezü nung high speed fiber connectivity agütsüsü imlar.

State nung telecom connectivity jenjang talang agi agütsüba atema aser mera tali agia meta talangba nung aliba nüburtem nem connectivity agütsüsü asoshi inyakba atema MP S Supongmeren Jamir-i tenüngsang agüja liasü.

Paia state aser centre nung akokba lemang nung yariteptsü mulunga lir ta shia liasü.

Mokokchung nung NEPEX atema senden amen

Dimapur, Mongputeni/Oct. 22 (TYO): Mokokchung district nung Nagaland Emergency Preparedness Exercise (NEPEX) atema Table Top Exercise sequence senden ka ADC Planning indang Conference Hall, Mokokchung nung October 22, 2024 nü mena liasü.

Iba sentong nung Deputy Commissioner, Mokokchung, Thsuvisie Phoji ajanga NEPEX 2024 Multi State Mock Exercise indang tali tejangjaba nung rasaas ashi aser Assistant Commissioner, Shreyansee Jain, IAS ajanga Incident Response System (IRS) indang PowerPoint presentation agüja liasü.

Additional Deputy Commissioner Mokokchung, Chumlamo Humtsoe-i züngsemtem den Mock Drill tensa aser resource mobilization indang jembia liasü aser Nagaland Police Telecom Organization (NPTO) ajanga wireless set amshitsü yimyatem sayua liasü.

Dimapur nung Anti-Rabies Vaccination Drive agitsü

Dimapur, Mongputeni/Oct. 22 (TYO): Dimapur District tesem ajunga nung kiset shiruru atema anti-rabies vaccination drive ka office of the Chief Veterinary Officer, Dimapur ajanga ayongzüka agitsü lir.

Ibai rabies tashidak prokshia aoba nungi nokdangtsü

nükjidong nung lir, koba tashidak tamajung saka mapang shidak nung azü aser tanü amala kiset shiruru nem vaccine agütsüba ajanga nokdangteter.

Iba sangdong ya Deputy Commissioner, Dimapur, Dr. Tinojongshi Chang ajanga October 21, 2024 nü agüja liasü.

Iba vaccination drive ya yimtsüng, colony aser ward ajunga nung teshimtet tesemtem nung agütsü aser kiset shiruru metsürtemi pei shiruru nem vaccine agidakstsüla aser Colony, Ward aser Village Councils temi ketcangsür den yariteptsü ayongzüker, ta sangdong ajanga ashi.

Dimapur nung October 24 nü Mock Drill Exercise agitsü

Dimapur, Mongputeni/Oct. 22 (TYO): Ajungben alimar lendong balala atalokba mapang renema alitsü asoshi District Disaster Management Authority (DDMA) Dimapur ajanga October 24, 2024 nü Mega Mock Drill Exercise agitsü, koba küm shia agiba Nagaland Emergency Preparedness Exercise (NEPEX) nung shilem ka lir.

Menoknok anoker ama exercise ya Office of the Deputy Commissioner, Dimapur Government College, Government Higher Secondary School Lingrijan, Forest Department Residential Area,

Pantaloons Shopping Mall, Primary Health Centre (PHC) Duncan Bosti, aser Indian Oil Corporation Limited, Dimapur Depot nung agitsü.

Iba mock drill ya anepdang 9:00 ako nungi terzüksü, anungji nüburtem maoksatsü aser ketcangsürtem den amalitep akatsü ayongzüker, ta Deputy Commissioner aser Chairman, DDMA, Dimapur, Dr. Tinojongshi Chang, NCS ajanga sangdong ka nung ashi.

Iba exercise agiba mapang lenmang kar nung traffic nunga kongshitsü akok, ta sangdong ajangasa ashi.

Dimapur nung sen lakh 43 jenjang yi aser mozüraksaa indok



Dimapur, Mongputeni/Oct. 22 (TYO): Liquor/Drugs Destruction Boards ajanga October 22, 2024 nü Excise Directorate Complex, Dimapur nung NLTP Act 1989/NDSP Act 1985 nung shia aliba tapet ozüng kubok sen lakh 43 jenjang yi aser temesepba mozü raksaas indoka liasü.

Item temesepba mozü aser yi raksaa indokba sentong nung menden Jt. Commissioner of Excise(NC) liasü, aser Superintendents of Excise Dimapur Dist., Mobile Squad and Narcotic Cell ajanga apuba indang report zünga metedtakstsü.

Mongulbarnü Liquor/Drugs Destruction Boards yagi IMLF/Beer temeyoktep bottles 25,558, Spasmo Proxyvon capsules 2,100 aser Heroin gram 821 raksa indoka liasü.

Item temesepba chiyongstsü apuba nungi revenue aruba sen lakh 7 liasü, yi dak sendakba

aibelen nung nisung 619 aser temesepba mozü dak sendakba nung nisung pezü apu, ta Commissioner of Excise & Prohibition, Dimapur, H. Atokhe Aye, NCS ajanga sangdong ka nung ashi.

Item temesepba mozü aser yi raksaa indokba sentong nung menden Jt. Commissioner of Excise(NC) liasü, aser Superintendents of Excise Dimapur Dist., Mobile Squad and Narcotic Cell ajanga apuba indang report zünga metedtakstsü.

Kasa mapang Commissioner of Excise, H. Atokhe Aye, NCS ajanga Excise Enforcement personnel nem tenüngsang agütsü aser nübu peria meliaka pei mapa saksalema inyaktsü ajungshia liasü.



DAYO Economic Resurgence Komite convenor Dr Michael Imchen aser ICAR, Jharnapani den 2nd phase nung asen poultry farmers 12 nem an chanu 1425 tanü 22nd October 2024 nung angati alemba den technical support agütsü.

Sl. no	City	Location of air station	Type of area	Monitoring dates			Permissible limit As per the National Ambient Air Quality Standards "Iba tasazük alemabo metudakstsüla"
				15.10.2024	17.10.2024	19.10.2024	
1	Dimapur	Bank Colony	Residential	98	104	78	100 µg/m³
2		Dhobinala	Commercial	112	165	215	
3		NPCB Office, Signal Colony	Residential	84	72	75	
4		Tenyiphe, Chumoukedima	Commercial	84	98	86	
5		Nagarjan	Residential	153	97	74	
6		Viola colony	Residential	79	82	68	
7		Burma camp	Commercial	76	92	71	
8	Kohima	Opposite NST Office	Residential	42	38	49	
9		PWD Junction	Commercial	70	112	86	
10		High School Junction	Commercial	93	122	74	
11		Midland (Upper)	Residential	48	105	75	
12		Forest Colony	Residential	49	83	70	

Iba osang ya nübortem ajangzüksü atema Nagaland Pollution Control Board-i agütsür.



Singapore Defense Minister Ng Eng Hen-i New Delhi nung 6buba India-Singapore Defence Ministers Dialogue metenzük tsüngda Guard of Honour asadangba noksa nung angur.

China-i LAC nung patrol atema mulungtepba jangjatsüogo

New Delhi, Mongputeni/

October 22 (Agencies): China-i Mongolbarnü sangdong ka ajanga, Line of Actual Control (LAC) nung patrolling dak sendakba nung India den sensaksem tejakdangi odar, ta metedaktsü.

Beijing nung foreign ministry-i ashiba agi, ken o dak sendakba nung linük ana tsüngda tangatetep ka dangi aruogo.

Foreign secretary Vikram Misri-i Hombarnü sangdong ka ajanga linük ana tsüngda arrtsü nung mangatetep aliba tesem nung patrolling dak sendakba nung tangatetep ka dangi aruogo, ta ashiba sülen ghonda 24 shi lir China foreign ministry otongdar Lin Jian-i iba osang lemsatepa liasü. Iba telemtetba agiba ya linük ana tsüngda küm pongububa mangatetep adoka aruba bentetsü atema tongtibang jenjang ka asütsü.

"Arrtsü nung mangatetep

aliba dak sendakba nung China aser India na diplomatic aser

military channel balala ajanga sendaktepa aruogo. Tang linük ana tsüngda tangatetep ka dangi aruogo, koba China-i jenjang tajung ka agiba ama bilemer," ta Lin-i ashiba state meyong media sangdong ka ajanga metedaktsü.

India aser China na arrtsü nung mangatetep aliba tesem nung patrol dak sendakba nung tangatetep ka dangi aruba indang telangzüba agütsüba mapang pai iba olen lemsatepa liasü.

"Taruba shilem nung China-i ken o bentetsü atema India den longjemer inyaktsü," ta Lin-isai shisem.

Russia kübok Kazan yimti nung Brics Summit amenba mapang Ato Kilonser Narendra Modi aser tir Xi Jinping na senden amentsü imla aliba mapang ka nung tang Lin-i iba

olen lemsatepogo.

Lenir ana ya Mongolbarnü Kazan yimti tongogo aser tena October 23 nü ajuruteptsü imlar, ta ken o jangja alirtemi metedaktsü.

Modi Russia semdangtsü aliba indang osangbenertem den sensaksema mapang Misri-i patrolling dak sendakba nung tangatetep ka dangi aruba indang metedaktsü aser ashiba agi, linük anaprongla indang sepaitem arrtsü nung mangatetep adoker aliba tesem nungi atsüngintsü aser 2020 küm mangatetep tenzükba ken o bentetsü atema inyakteptsü.

Patrolling dak sendakba nung tangattetep ka dangi aruba mesüra de-escalation atema inyakyim aser yimzung mapang sepaitem amendak aliba tesemtem tanaben meyipa aotsü atema mulungtepba indang India aser China napronglai osang tejangja magütsü.

ajemdaker merenshiogo.

Iba sülen Banerjee suspend sütstsü asoshi vote agitep aser motion pusema vote teku agütsü aser motion anema vote ti agüja liasü.

JPC senden nung BJP nungi Abhijit Gangopadhyay den o langtepba mapang Banerjee-i glass bottle ya jakrepa mereploka liasü.

Bottle jakrepa sülen TMC lenir ya jembtsüba aser tetuyuba temeyong yiru aser pezüben arúa anepalua liasü. Yirur aliba anepaluba sülen pa senden amenba takdangi AIMIM tekolakba Asaduddin Owaisi aser AAP lenir Sanjay Singh

BJP nungi Jagdambika Pal-i

aniba committee ya mapa nungi anener aliba obendangertem telok kati ken o dak sendakba nung parnok tebilemba lemsatepba angadangba mapang opposition züngsem temi iba bill nung parnok indang stake kechi lir ta asüngdanga liasü.

Hombarnü JCP-i ministry of minority affairs nungi ketdangsürtem den ajurutep aser bill dak sendakba nung tebang agi kuli agütsütsü jaoka liasü, ta ANI-i ashi.

Iba bill ya yimden yimsüsüba dak sendakba nung ajangzüksü atema benokba atema Oppositon-i Centre sorkar aitsüogo.

Odisha nung tejenokdak 800 renema lir: Minister

Bhubaneswar, Mongputeni/

October 22 (Agencies): Bay of Bengal nungi yipru tesashi ka adoktsü aliba atema renemshia aliba mapang Odisha sorkari lendong tulu ajangshitsü aliba tesemtem nungi anintsü aliba nübertem atema yipru nungi tejenokdak 800 shi renemtsüogo.

Odisha Revenue aser Disaster Management minister Suresh Pujari-i Mongolbarnü ashiba agi, ketcardsürtem tang tashi nung cyclone relief centre 250 semdangogo, kong nübertem aninba sülen jenodaktsütsü.

Chiyongtsü, tzü, mozü, electricity aser tanga tenüngdakba osettem yipru nungi aninba nübertem atema renema tokja lir, ta pai ashi.

Yipru nungi tejenokdak 800 dak alaka minister-isa, ano school aser college tem nung khen atema tejenokdak talila 500 renema tokja lir, ta metedaktsü.

Ketdangsürtem dang yipru nungi tejenokdak balala nung tetsürtem atema jenjang agütsütsü tetuyuba agütsüogo, kong tetsür police tem yoktsü, ta pai ashi.

Paisa, Chief Minister Mohan Charan Majhi-i, yipru nungi nisung asüba ka danga majangshitsü asoshi yipru agi kanga mejungi kongshitsü aliba tesemtem nungi nisung ajak anintsü nüngdakba lemsatepogo, ta ashi.

Minister-i ashiba agi, sorkari mashisa aliba tetsürtem indang list ka yangluogo, shirnok hopta

ana tsüngda tanur asotsü imlar.

Lendong ataloker aliba mapang kecha tetsükdaktsü majangshitsü atema item tetsürtem ajak anasa aliba mozuki kati anirogo.

Tasüngdangba ka langzüba mapang minister-i ashiba agi, kidangi auer atutsü tsübuba agi nisungtem kari pei ki toktsür aotsü memulunger. Tejenokdaki anir aotsü aliba yimtsüngtem tali meita atatsü asoshi police nem tetuyuba agütsüogo, ta pai ashi.

Kümdangshia atatsü atema state sorkari Ganjam, Puri, Jagatsinghpur, Kendrapara, Bhadrak, Balasore, Mayurbhanj, Keonjhar, Dhenkanal, Jajpur, Angul, Khurda, Nayagarh aser Cuttack district tem nung Bodhbarnü nü nungi tenzükka anogo asem atema school ajak shibanga atatsü tetuyuba agütsüogo, ta ketdangsür kati ashi.

Odisha sorkarisa, October 23 nungi 25 tashi staff tem ajak indang leave thitsüogo. Department ajak dangi yokba shiti nung Special Relief Commissioner DK Singh-i, parnok dang renema atatsü metedaktsü.

October 24 aser 25 ta anogo ana nung ya state nung lendong tulu ajangshitsü akok ta shia Pujari-i, Balasore, Mayurbhanj, Bhadrak, Kendrapada, Jagatsingpur, Jajpur aser Cuttack nung October 24 nü aser Balasore, Mayurbhanj, Bhadrak, Keonjhar nung October 25 nü tzünglung kanga sashia aruba den mopung kanga sashia aontsü ta ashi.

India-i Palestine nem mozü aser chiyongtsü agütsü

New Delhi, Mongputeni/

October 22 (Agencies): Ministry of external affairs-i Mongolbarnü sangdong ka ajanga, India-i Palestine nem tang mezüngbuba teyari yokogo, ta metedaktsü.

United Nations Relief and Works Agency ajanga humanitarian teyari ton 30 Palestine dangi yokogo, kong mozü, surgical supplies, aser high-energy biscuits tem densema lir.

"India-i UNRWA ajanga Palestine nungertem dangi humanitarian teyari yokogo. Teyari mezüngbuba shilem nungi mozü aser chiyongtsü ton 30 densema lir koba tanü yokogo. Oset yokba rongnung mozü, surgical supplies, dental products, general medical items aser high-energy biscuits tem densema lir," ta external affairs ministry otongdar Randhir Jaiswal-i ashi.

July ita India-i United Nations Relief and Works Agency for Palestine Refugees in the Near East (UNRWA) nem USD 2.5 million agüja liasü, koba 2024-25 atema USD 5 million agütsütsü aliba nung shilem ka ama iba sen agüja liasü.

India-i, Palestine nung mangatetep adoker aliba ya sensaksem ajang bentetsü atema nenshia arudar aser Israel aser Palestine nunger state ana küma lemdanger yimzung nung alitsü atema sensaksema nongita arudar.

Israel aser Hamas na taoba küm October 7 nü nungi raratepa arudar. October 7 nü Hamas teloki Israel maka nisung 1,200 tepset aser nisung 253 pur oa liasü.

Iba sülen Israel-i telangzüba tesashi agüja Gaza amak tenzük aser tang tashi nung Palestine nunger nisung 41,500 dak tema tepsetogo, ta Gaza health authorities-i metedaktsü.

Gaza nung nütsüngyongsük million 2.3 ajak amai pei talidak ki toktsür jensiögo aser iba tesem timba kanga mejungi raksar lir.

Israel aser Palestine na küm aika mangatetep adoka arudar, ajisüaka Gaza nung tang rara ya ajak dang tamajungtiba asütsü aser iba ajanga Middle East daka kongshiogo.

Kasa mapang nung hopta ishika tsüngda Israel aser Lebanon nung Iran-i teyari agütsüba Hezbollah telok na tsüngda raratep taliba kümogo.



NSE Mumbai nung Hyundai Motor India indang IPO listings sentong nung Hyundai Motor Group mendenbuba Euisun Chung aser National Stock Exchange MD&CEO Ashish Chauhan na tangokba noksa nung angur.



TIR YIMYIM

YIMOBILEM (EDITORIAL)

DIMAPUR RASEMNÜ, OCTOBER (MONGPUTENI) 23, 2024

Public-i tax ajak menoker

- P Tiamongba Aier

Dimapur Municipal Council (DMC) nem pingana seret ka nung senpak 3 agütsüba osang ka October 19, 2024 nü Global Window ajanga sangdonga liasü. Dimapur nung aonsotsü wholesale nung ayoker nisung kati pingana teraksa atema senpak 3 magütsüba ajanga pa den nisung ka dak nisung kari teka sangshiba sülen iba inyakyim ya jungkai adokogo. Murgipatti nung wholesaler temi ashiba agi tsümar kati DMC tenüng nung parnok dang nungi pingana seret ka nung senpak 3 meshir aser iba nisung yagi Naga nunger kar anir oa wholesaler ana dang sen meshia teka sangshiba amokmeren ta shiogo. Ano tesüngmangtsükají nisungtemi wholesaler ana züka merenshiba sülen police ket nung agüja tepuokdak ayutsü ta amokmerena police aja aser tesem tonga police arur tena amokmeren ta shiogo. Dimapur Deputy Commissioner, Dr. Tinojongshi Chang, NCS-i July 5, 2024 nü DMC züngsem 23 nem tenangzükba agidaktsür office lapoka mapa inyaka arudang, ita asembuba nung iba amai atalokba osang angashidang kanga aoksar saka iba ya tang tasen inyakba mapa kabu masütsü südi. Hao, Municipal Council ka ketcangsüa aotsü atema senotsü kanga nüngdaker aser iba jagi parnoki toll tax, parking tax, shop tax, vendors fee amala balala sarur aser itemji ozüngi melaba mapatem lir. Saka aonsotsü shia atema sen meshia agiba yabo tim masü ama bilemer aser aonsotsü abenba gari shia dang tax meshidat aser item shishilembaba wholesaler temia dokan tax agütsüdar. Ajisüaka, DMC-i vegetable wholesale market renloktsü aser anepalutsü atema mejeta aonsotsü shia tax meshir sura, ibaji tim dang asütsü ama bilemer, saka reprangdang nung Dimapur Murgipatti nung aonsotsü wholesale ayokdak yasa temenentiba aser tesempatsü aketba tesem rongnung ka lir. Gari lenmang majungba agi gari dang masü nisung-a dena sadema senzüenbong mesüteter, külen tzünglu tera arura lenmang nung tejajalen mali kümadoker. Yamaji süaka Dimapur nung dang masü saka temeket district tem iba wholesale market nungi bener aoba aonsotsütem ang alia chiteper. Anungji DMC-i aonsotsü shia sen meshir sura ibaji vegetable wholesale market renlokba aser anepaluba nung amshiang ta rongshitsüla. Tanübo tanga business indang mejembili saka kakteta ao nungbo tanga chiyungtsü aser osettsüset ajak nung yamaji tax meshia agiya alitsü aser iba jagi dang Dimapur nung sensakertembo melitetsü tensa ka ajurua lir. Kechiyong Dimapur aser Mokokchung jenjangtem medemdagra aiben Mokokchung nung ang dalangba asüba angazüka arur. Assam denbo Dimapur-sa anasatiba aser iba dakji alia train station-a yangi lir saka kechisarena nung jenjangbo anogoshia tujen atur aser tanga district tem dang nungi tasakba anungji iba khuret atema nübortemi süki ia bilema mapa kar inyaktsü lir ama bilemer. October 19, 2024 nü DMC-i pingana nung senpak 3 agiba osang yimjak nung prokshiba sülen kija aser teloktem hao mesüra shitaka ta asüba ola kecha maliba angudang kanga süngmanger aser Naga nunger loktitentet paikaya kechi atema tenteta ayu ta ratar. Yimya agi Dimapur Chamber of Commerce and Industry (DCCI)-i anir telok karib ola adokser sernung kecha mali. Ano, Business Association of Nagas (BAN) mesüra ibala mesükba shishilembaba dak sendakba teloktem aser talisa Against Corruption and Unabated Taxation (ACAUT)-i yabo tim masü ta olen kabu ashitsüla sernung ola kecha mali aser iba ajanga parnokia DMC pusemer asütsü akok ta ang bilemer. Kechiba ola adoktsü ajungshir ta sura DMC süang, Naga yimten telok mesüra syndicate mesüra ozüng alema sen sarurtem süang, parnoki tax meshia agiba ajaki public ket nungi dang agütsür. Haoko, senjibo wholesaler, business inyaker aser dokan kiburtemi ang parnok ket nung agütsür saka ibaji senji temloker public dang ayokerji tatem nungbo public-i ang tax ajakji menoka anidaker. Anungji shishilembaba dak sendakba teloktem ibala inyakyim atema ola madokra Naga Council Dimapur (NCD)-i anir Dimapur nung CSOs balalai public atema noktaktsüla. Kechiyong yamai dang ngasangatema kechisarena nung tax talitabong meshia dang agidaktsüra kobi melii Dimapur nung sensaker aser mokokmeinertem tali majungtsü, auer teimba arentsü aser Dimapur nung arua linürtem malitsü. Aser ajak dang tongtipangbaji Naga lanur entrepreneurs aser shishilembartem züina moutetsü anungji joko 'illegal tax' ta ajaba anema ola tulu adoka CSOs-i anir Dimapur sensotemi iba khuret ya tera nung atüsüda endoktsü merangtsüla. Yamaji asü nung dang Dimapur ta telinütsü ka akümtsü aser taoba mapang amato takar-sensaker ajak litetba tesem ka asütsü.

OLEMSABANG

Nüjiso bushidang lisopur nem timtem magütsütsüla

~ L. Kika Pongener.

Tanü asen Naga nunger nubur libaliroba jenjang asadanga reprangdangra, noklang nung metsü (20%) shilem takar-tulur asütsü aser shilem tir (80%) tilar-sensaker asütsü. Kecha mimshia jembitsü mali, linuk tenzükertem telok aika kümber, telok ajak jagi saru saruba agi asen nuburtem kanga tim-atemer. Aji oda, nuburtem dangpo indang-indanga (Directly) temelen saru (Tax) sarua malitsü akok, saka shishilembartem dang temelen saru (Tax) meshiba ajakji osettsüset jenjang dak enoker meshir asünung, asen lima nung oset jenjang Assam-India lima dang nungi kanga tasakba meshir, aser osettsüset nung jenjang tupet atur. Asen kidanger Assam nung Lahorejan, Khatkhati, Bokajan nung küsa oset ka jenjang Dimapur dang nungi kanga tajemba agi angur. Kechiba sura asen Naga lima nung 'Tax' tapu-tapu katiba ajak ya osettsüset jenjang dak enoker meshir. Joko asen nuburtemi saru-saji tali saruba yagi timtem maremteti ola adoker aser Nüjiso dang nungibo, saru-saji kecha makai sunep-sunepa linuba-ang taginuba tuluba kümogo. Anungji linuk tenzükertem nuburtemi timtem maremi ola adokbaji angashitsüla aser nubur nem timtem tali magütsütsüla.

Aji oda, India nunger nungi Nüjiso bushidang, asen atepzung nung Nüjiso dak sendakba mapa agi tim-atemba ya joko nuburtemi maremer. Asen tsürabur mapang nung linuk tenzüker o nubur na tesendaktep kanga tajung liasü. Linuk tenzükerji nubur atema tetsübotsü telok masü, nubur nem timtem agütsür telok masü, mesura nubur amokmerena telok masü, saka linuk aser nubur atema pei taküm bendanga agüja linuk tenzükertem liasü. Anungji nubur ajungai linuk tenzükertemji kanga akümtsübu lia aru. Aji oda, tanüa iba küsa tamang katetba, temulong lemtetba, akümtsübutepba, temeimtep aser libaliro tajungji meraksai, linuk tenzüker o nubur na tsüngda tesendaktep tajung akatsüla. Aji oda, tanüa nubur ajaki Nüjiso bushirtemji arok atema timtem linuk tenzüker ta kanga akümtsübur. Anungji linuk tenzükertem-ia nubur dang kanga meima benshitsüla. Ajisüaka, linuk tenzükertem nubur dang meimtsü melena, timtem ang tali agütsüra, Nüjiso bushiba tetezü ya kechi asütsü....??? Nubur anisungzüka yimjung nung sunepa lidaktsütsü bushir asü...??? Mesura amokmerena tetsübo tatenden tia nung lidaktsütsüba bushir...??? Aji oda, asen lima sunepa yimjung nung alitsü atema Nüjiso bushir....Saka asen atepzung nung nubur tsüngda yimjung tesunep makara, Nüjiso bushiba tetezüji kechi asütsü....??? Anungji linuk tenzüker o nubur tsüngda tesendaktep meraksatsü kanga kümdangtsüla.

Temalen shisemba ama, asen Naga nunger kibongtem rongsenkettsüng jenjang (Economic condition) asadanga reprangdangra, noklang shilem nung tir (80%) sensakertem, tanü poksung aayanga alirtem, aser itasen tila agi kibong/taküm mesua alirtem asütsü. Noklang nung shilem metsü (20%) dang tulur aser taka-taitertem asütsü. Tanü asen Naga nunger Nüjiso bushir telok (Faction) aika küma lemsaba agi saru-saji tali aküm....Aser saru-saji onsaraba agi sensakertem timtem marem ola adoker. Ibajagi, nuburtemi Nüjiso bushir telok ka aser saru molok ka dang asütsüla ta akhanger. Sorkar tenzüker danga itasen nungi percentage (%) meshir....Ibajagi tilartem balaka timtem marem ola adoker. Ano Contractor & Supplier danga 'Tax' meshir....Ibajagi terenlok mapa inyakba nung tetsüdaktsü ajurur aser mapa-a junga meinyakteter. Asen Naga lima nung shishilempaba mapa tongtiret ajak tzümartem amokbanger, ariana lisopur shishilempar kar alinung....Parnok dang 'Tax' sarua amokmerena remsepa yutsütsü memerangtsüla. Aji oda, lisopur shishilembartemji linuk tenzükertem-ia nungita yaria ajungkettsütsüba-ang merangtsüla. Ajak dak alia, senotsü meshitsü/akhangtsü (Demand) mechii nung lisopur shishilembartem pua bener aoba, ibala ama tentet tamajung yabo mebenshitsüla. Iba ama tentet tamajung benshiba yagi, linuk tenzüker o nubur tsüngda nung temeim mekonga akümtsü aser tsükchitp tali adentsü aser nubur o linuk tenzüker tsüngda rara (Civil war) adoktsü kecha meteta maka.

Tanü asen Naga lima tia jungjunga asadanga reprangdangra, kanga teratatsü (Dilema) jenjang ka nung nokdaka lir. Joko nuburtemi Nüjiso ya shitakba asangsang (Reality) nung angutsü asü mangutsü (?)....ta rata-matar...!!!???? Tip külen tema sorkar nung Nüjiso tatempang telemtetba agitsü nungdem nung 'Opposition-less Govt.' ka yanglur, meshitak inyakyongja temetongshitsür mali....Ibajagi lenmang alis nung asen nuburtem akoksar. Tip külen linuk tenzükertem telok (Faction) tali-tali lemsar....Tip külen saru-saji tali saruba agi osettsüset nung jenjang tupet atur....Ibajagi nuburtem timtem marem asateper. Ano mapang shia sen 'khanga meshitsü' atema nisung pua bener aoba otsü/osang agi nuburtem aoksadaktsü....!!! Aji oda, iba jenjang nung ya-sa maneni ora, nubur o linuk tenzüker na tsüngda nung temeim mekonga akümtsü aser tesendaktep raksatsü, aser nubur tsüngda nung rara (Civil War) adoktsü kanga tsüboseta bilemer. Anungji, India nunger nungi Nüjiso mangu tsüngda nung asen atepzung nung, nubur o linuk tenzüker tsüngda rara madoktsüla, linuk tenzüker aser nutsüng-nubur ajaki tensia kanga azüoka kümdanga alitsüba kanga tongtipang lir.

Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazüngeri angateta agitsü mepishir

Somalia nung tamanger ka dak tasemben züka merenshi

Nairobi, Mongputeni/Oct. 22 (Agencies): Somalia nung Islam nungi Khristan yimsü agizüker ka May aser July ita nung merenshiba sülen pai anir tekülem sentong agir ta temulung melemi par kinunger Muslim nunger temi ano October 5, 2024 nüa züka merenshi ta pai asir.

Lower Juba Region nung jila ka nung Mohammad Abdul-i par kidang miima tekülem sentong agia alidang par kinunger Muslim nunger pezü arua pa tekülem sentong atem ataa liasü. Pa tekülem sentong temer kimai aludang kinungertem arua aliba ngua pa aoksa, shirnoki pa den asüngdanya tenzük, ta Abdul-i ashi.

Parnoki pa dang 'Na kechiba Muslim nunger dang nungi balaka kulemer? Nü tamangba yimsü kechiba khenyongi balaka? Na sarasademdang kechiba ki telunglen nungi shibanger?' ta asüngdanga liasü.

Iba mapang Abdul-i 'Kü sarasadem ya ni aser kü Kibur Isa (Yisu) tsüngta miim sarasadem lir, anungji ni kechi atema yimjak nung sarasademsü? Ibai nisuntem peladaktsü yimsü ka dang lir, saka ni külemba mapang Tsüngrem dang peladaktsür, shiba kotak nung lir,' ta langzü.

Parnoki pa dang Muslim nunger den külemei Islamic tekülem agitsüla ta ashidang pai Khristan yimsü agizükogo aser Yisu-ji pa Kibur aser pa kumzüksang ta langzü. "Ni kumzüksang Isa-i kü mulungjang ngua lir, aser kü mulung nung ni pela lir, anungji ni yujang," ta Abdul-i ashi.

Iba mapang kinunger kati pa dak ponglok aser kati pa dak

Lower Juba Region nung

süng agi azük aser ano kati tejak nung ama, ta pai ashi. Pa teka abelen teret raksa, teka achichilen temeyong yiru aser tejak nung zübu adok.

"Nai na aser ner kibong asoshi timtem meshir," ta kinunger kati pa dang ashi aser iba mapang Abdul-i, "Nenoki züka merenshinera ano merenshiang, saka Isa-i ni kumzükogo. Ni asüyonga mesüra takum aliyonga, ni Pa tenzüksü," ta langzü.

Parnoki yangji pa temang nungi azü yima yutsür aodang nisung kati, "Nai Tsüngrem meimer asünungji, Pa nem lenmang shidak nungji anidakjang," ta ashi.

July ita pa kinungtsüi Abdul dang par kidang kisemer amentsü yangluba takdang tilaka nungji Lai bushiba, sarasadema mesüra tekülem sentong magitsü shia liasü, saka August ita tashinung pai Lai bushiba aser sarasademsü atema yangji cell groups asem tenzüker liasü.

September ita tetenzüken par kinunger kati iba takdang nung pai anir sarasadema tekülem sentong agiba angu. Kinunger temi pa kinungtsü dang, "Nü kinungboi kishi shibanger sarasadema ngua ni süngmanger. Iba sarasadem yimsü ya balaka, Muslim nunger sarasadem memesük," ta shia liasü.

Iba sülen kinungersang ya arsanga ao, ta Abdul-i ashi. Parnok takum lendong nung aliba angateta Abdul sarasadem tembangba sülen kinungtsü pa dang par kinunger aruba otsü ashi.

Tena ya tanur asem lir, ka arishi küm 9, ka küm 5 aser ka küm 3.

Lower Juba Region nung

Kismayo tezülen May 5 nü par kinunger Muslim nunger temi Abdul dak kotari agi atsüng aser pa mozü kidang temang anepalua amungdang par anük-apang temi pa kinungtsü aser tanurtem anir ao. Abdul-i March ita Khrista agizük.

May ita nunga pa tekolak nung zübu tulu ketsü aser teka raksatsü, aser July 8 nüa yamaji züka merenshiba sülen pai o mejembiteti akum, ta pa kinungtsü ashi. Kinunger temi pa kinungtsü tetsüng raksatsür aser par tanurtem dak azük.

May 5 nü kinunger temi par kiraksatsüba sülen Abdul-i ki ka nung sen agütsür alir.

Somalia indang constitution nung Islam ya state religion ama shia lir aser danga yimsü prokshiba nokdanger, ta US State Department ajanga asir. Parnok özüng ya sharia (Islamic law) tesayuba nung ajemdaker lir, aser Muslim yimsü mamanger nem khenyongi tatok magütsür.

Tamangba yimsü yutsüba asoshi tasüba temerenshi agütsütsü ya Islamic law nung shilem ka lir, ta parnoki asir aser Somalia nung Islam yimsü metsüngäreta amshiba telok, Al Shabaab ya Al Qaeda den sendaktepa lir aser iba tesayuba sülen anidaker.

Al Shabaab mesüra Al Shabaab bhukumer temi Kenya north tsütsü 2011 küm nungi non-local nisung aika tepsetogo aser iba mapang Kenya sepaitemi African coalition anir Somalia nung kiralongrar anema rara liasü.

Open Doors ajanga alima nung Khristanpur alitsü asoshi linük tamajungtiba 50 asadangba 2024 World Watch List nung Somalia ya jenjang tanabuba nung lir.

ANOGO ABEN TSÜNGREM DEN

Teti adenba

"Ajiang, alima matem tashi ni nenok den teti dena lir."

Kibuba shia aruba aser kotaki atuba tetsüngda anogo lir tashi liasü. "Kuli jenti agi peisasa parnok dang taküm sayu" - T.M.:1:3. Item anogo lir nütsüngtem den alidang Kibubai tesem ka nung dang nütsüng ali masü, yimya aser mapang balala nung parnok den ajurutepa jembia liasü. Parnok dangi aoksa adoker Pai parnok jembiba ajak angashiba shia liasü. Pa tenük menguaka Thomai jembiba Pai angashiba ashi. Item anogo lir tatem nung Pai tenangzükba tejangga agütsü, "Ajiang, alima matem tashi ni nenok den teti dena lir."

Item mezüng nütsüngtemi parnok tenüki Kibuba menguaka Pa parnok den dena lir ta tangazükba tulu angazük; kasa lessonji nai aser ni angazüker asü masü? Kibuba shia aruba ajanga item tashi mait aser tasü mait nütsüngtem tasü tait aser tashi tait melenshi ta asenoki aiben angashia arur. Saka aji ochiji ibaji dang masü. Parnok tepela, mainshi aliba, Khristai kümzükba ain metsübüi kuliji mapa pungu ka nung dang adokdaktsüba liasü; mezüngbuba, Pa atangji shia aru; tanabuba, Pai kotak chuba menden nung ajak azüoker; tesembuba, Pa tenük agi mengui parnok den ajaklen alir; pezübuba, Pa tamaren yimli nung tanaben adoktsü; pungububa, Kibuba marudang parnok temang asütsü aser Kibuba den kidang alitsü.

Anogo lir alidang parnoki ochi angazükba jenituk agi mengui Kibuba parnok den teti dena lir ta angazük. Pa temang tenük agi ngua aliba dang nungi tenüki mengui parnok den dena alibaji tali sentiba ta parnoki angazük. Pa tang parnok den tenük agi mengui dena lir- Tanel Temeshi ajanga parnok Pa dak lidaktsür! Yamaji tanüa asen Kibuba Yisu asenok den dena lir. Pa adenbaji akhüm ka ama masü, shidakba lir. Ibai tejembiba ka dang masü, mesüra jangratemsü o ka dang masü. Ibai teti taküm aliba Kibuba chichiba nung asenok den adenba lir.

Pa adenba tetezü, Pa asoshi kuli asüdang timatemdang ajaklen Pa dena aliba lir. Saka iba ama tenangzükba liaka aikati temulung makai akümer aser temulung masür. Koda taochitsü lir! Kodang Pa adenba metetta melilir, asenok melamelaa temulung makai kümduktsür, ratamatar, atasaa meliteter aser tai telemtetba agir; saka kodang Pa adenba metetta pelaa lidir, temulung makai akümdang tajung inyaktsü bilemer, rishikangshi mapang taremkü alir, lendong mapang tasü itdaktsür, telematep adokdang süngjema alir, terongjen mapang nung pelaa alir. Lisem limaji kolap naro ama akümer, aser ali tapungji atsüki ka akümer. Khristantem, item otém ken shisadangang: "Ajiang, Ni nenok den tatem tashi dena alitsü..."!

Harris-i tamangba yimsü temeden nokdangtsü: Trump



Washington, Mongputeni/Oct. 22 (Agencies): Hombarnü Donald Trump-i Khristanpur dang 2024 election nung shilem agitsü ayongzük aser pa ya tamangba yimsü temeden asoshi nokdaker ka

ama jembi, ta osang ajanga ashi. North Carolina nung "11th Hour Faith Leaders Meeting" nung jembidang, Kamala Harris-i aniba sorkari Khristanpur temeden nokdangtsü aser election ya

tanüla tebilemtsü ka lir ta ashi.

Iba sentong nung conservative pastor ishikati lokti den jembiba sülen Trump nokdak. Guillermo Maldonado, shiba Trump indang tembar aser pa sasa pa "apostle" ta ajar, pai iba election ya tanülar tongpang ka lir ta ashi.

"Asenok tang tanülar tongpang ka nung lir. Ibai achichi aser abelen indang masü, ibai tajung aser tamajung tsüngta lir. Tang rara tesashi raratar, aser asenoki asen linük kumzüksüla," ta Guillermo-i ashi.

2024 campaign indang National Faith Chairman, Ben Carson-ia kasaji jembi aser secular society tangatetba aitsü. "Iba election ya Tsüngrem kubok linük ka ama alitsü asü secular linük ka alitsü ta asüba indang lir," ta Carson-i ashi.

Trump-i iba sentong nung junga magütsü aruba indang jembidang Carson tenüng tetshia jembi, shibai 2016 küm nungi pa US tir asütsü Tsüngremi shimogo ta Trump dang ashiba bileyemteta liasü.

Catholic tekülem kidangi FBI temi itdangiter tem yoker aser Democrats temi Catholic

nunger ya linük nung kiralongrar ama bilemer, ta Trump-i aitsü saka kuli magütsütet.

Butler, Pennsylvania nung July 13 nü pa tepsettsü merangba indang Trump-i bileyemteta jembi aser ibaji ajanga pa tamang akangshi ta ashi.

Tematiba mapa asoshi Tsüngremi ni kumzük aser ibaji America nunger tamaren jenjang nung aitsü asoshi lir, ta pai ashi.

Pai Khristanpur dang vote agütsütsü ajungshi aser akhi mapang nungi parnoki vote ashi aser tang yimsüsüba kubok

5

sasa ashi. "Khristanpur, evangelicals... prangbong alirtem – parnoki vote magütsür," ta Trump-i ashi aser pai Johnson Amendments agentsü nangzük, koba ajanga arogo temi political candidates yariba nokdanger.

Trump-i taoba mapang Israel nung aliba US embassy Jerusalem-i belener aotsü telemtetba agiba indang süoka jembi, koba alima lenirtemi aitsü saka evangelicals aikati pela, shirnoki Israel ya Laishiba nung shina aliba ama agizüker.

"Tsüngremi tetsü aser tebur yangluba asenoki akangshia nokdaktsü," ta Trump-i ashi.

Iba sentong nung Eric Trump-ia jembi aser tebu, Trump ya tamangba yimsü temeden kumzüka ayur ka lir ta ashi aser tang yimsüsüba kubok

AO OSHI ANGAZÜKDAK:**TANÜ ANGAZÜKTSÜBA OJANG****Taolen****(adv)** aotsübalen (direction to go)

* Onok taolen tsütsü shia nokdaker sarasadem.

Taonung**(adv)** tanü manger külen (tonight)

* Taonung asenok külemi chiyongtsü.

OLONG PAITEP # 6959

1		2			3			4	
			5		6		7		
8									
			9						
10									
							11		12
13					14				
15					16				

TIPLÉN

TIPLÉN	LANGTSÜNGLEN
1. Anenzükda ki	- (5)
3. Asür mangyimba	- (5)
5. Temulung nung shisadang	- (5)
8. T ___ lu	- (3)
10. Takdang temalen	- (9)
11. Tesa ___ a	- (3)
13. Ajungbena temulungjang tongtonglatsü atu	- (5)
15. Tejen lai nung tesayur	- (5)
16. Tsüngsak-mopung	- (5)
1. Reprangdaktsü	- (4)
2. ___ ur	- (3)
4. Kiojen yangludak	- (6)
6. _____ ait	- (7)
7. Nagaland nung ayong ka	- (5)
9. Küm kasa purtem	- (5)
10. Tetsüng tajemetedak	- (6)
12. _____ adenshi	- (4)
14. Tsünüsénbongtsü adokdak	- (3)

OLONG PAITEP # 6958 TELANGZÜBA**TIPLÉN :**

TIPLÉN :	LANGTSÜNGLEN :
1. Kasa, 6. Rangben, 7. Mait, 9. Poktet, 11. Ati, 13. Atasa, 16. Rür, 17. Rajang, 20. Lanu, 24. Nüngjem, 25. Süra.	1. Khu, 2. Süjak, 3. Onük, 4. Oba, 5. Anü, 6. Ratet, 7. Mozü, 8. Ita, 10. Tar, 12. Tinu, 14. Salem, 15. Aja, 18. Anünü, 19. Taju, 21. Ano, 22. Onü, 23. Kua.

ITEM YA KANGA BILEMDANGER LANGZÜANG**Menden:** Nenok rongnung shibai item tasüngdangbatem langzütetdir ni sen Cr. 5 (five) agütsü.**Telok:** Come on, asüngdangangjung.**Menden:** Sura ni asüngdangti, nenokia mezüngbuba nung nenokia alima nung ya shiba Takatiba or Takatila (10 secs)**Telok:** Um um um' ato shibaji**Menden:** Tik tik tik 10 sec Time up. Ni shiti keyi (Earthworm) Alima nung ya na asenok meimchirtemi rongsen tera bendenra shinga mezüngshir, ano sensakertem palaka hao ta mali Sala. Keyi yabo meimchir aser shiruru ajaki ajemshiaka, alima ajunga ya pa meyong, saka pai shinga marishir, aser pa süh agi meimchir nem mol agütsür. Shidak süti.**Menden:** Alima aser Anüng lenmang ajak nung highway lenmang tesadembaji kong lir? Tenung shiang?**Telok:** Ayaaa yaaabooo..**Menden:** Ni shiti, Alima aser Anüng nung Highway tulutibaji O (road) Süt? Tanga lemangbo kodaka ulutir uluaka aiben Car, Train tem tsükteper aser nisungtem asür, saka O (road) nung yabo Alima nung alir ajak jembiba ajak ya konga tsükteptsü makok, speed a süang meilungia süang O highway nung yabo kodanga tsükteptsü makok. Anungji Alima aser Anung ajak nung highway tulutibaji O (road) ya lir. Ok.**Menden:** Tatemsia, Alima nungya koba tashi taitba?**Telok:** MCGREGOR - Tanabuba telok nungi NURMAGOMEDOV Menden: Nenoki tasüngdangbaji junga mangateti langzür, shiba ta masü koba ta asüngdanger. Anungji asüngdangba amaji aji ALIMA (earth) (world) kechiba súra cities paika nung ya ki 40 or 50 ben atongtepa yanglur, TRAIN jenti senzür, meimchir, shiruru, súngtonglitong ajak pa ma nung alir, saka akoker. Shidak süti, dang UPSC nungji ajak tamakok nguogo. Kü sen Cr. 5 ji ni bener taor, Salem.N. Saku Imsong
4th Mile Diphupar**Meghalaya sorkari contractors & state engineers dak tai tongloktsür**

Guwahati, October 22, 2024 nung Centre sorkar kubok company ana nungi (Agencies): Meghalaya nung tongtipang mapatong ka nung senotsü tim mesüi amshiba atema state sorkari contractors aser state engineers anema bushisüngdang ka tenzükogo. Iba mapatong ajanga Nongstoin aser Rongjeng adena Shillong den Tura sendakteptsüba liasü.

Iba mataong atema mezüngbo Rs 1303.83 crore asadangteta liasü saka aiben meypa reprangshiba sülen Rs 2366.77 crore aküm. Iba mapatong ya 2014 nung tembangtsü lateta liasü. Iba ken o nung private

Intelligence osang kar nung ajemdaker parnoki Guwahati tashi Indigo flight ka nung aotsü nisung ana apu.

CISF personnel-i temulung melemi bilemer nisung ana indang hand baggage reprangdang gold chains ana (623.52 grams) bera aliba angu. X-ray scanners ajanga reprangdang regional market

nung Rs 44 lakhs alang gold chains angu. Tena ya Lourembam Ramananda Mangang aser Kshetrimayum Gulson Meitei na ta jangjaogo aser tena ya Imphal West district kubok Iroishemba nung alir. Tena den tena ket nung apuba hon Customs Division, Imphal ket nung agütsüogo.

Manipur CM-i Senapati district nung mapatong 2 sayatsü

Imphal, October 22, 2024 class education agütsü aser (Agencies): Manipur Chief Minister N. Biren Singh-i Senapati District nung Maneni, Manipur nung Maneni, Manipur nung mezung atema multi-level parking facility ka lapoktsüogo.

Indian Institute of Information Technology (IIIT) Mayangkhang ajanga world-class education agütsü aser lisopur lanurtemi maongka aika angutsü. "Item mapatong ajanga sorkari hill districts tarutsü tajung atema alizüng yur inyakba kuli agütsür. Item mapatong ajanga tesem renloktsü aser tensa tajungba akümtsü" ta CM Biren Singh-i ashi.



Sikkim kubok Dalapchand Government Secondary School nung period-friendly toilet ka lapokdang agiba noksa angur. SFA Group, France nungi senotsü teyari agüja Sulabh Sanitation Club-i menstrual hygiene ajungkettsü atema iba mapa inyak. Iba toilet nung sanitary napkin dispensers, private changing areas lir aser privacy, cleanliness & accessibility nung temulung agütsür.

GOVERNMENT OF NAGALAND
OFFICE OF THE LABOUR COMMISSIONER
NAGALAND: KOHIMA
New Capital Complex

No.LBR-Estt/570/2006//

Dated Kohima, the thOctober, 2024.

NOTICE INVITING EXPRESSION OF INTEREST

Labour Department invites sealed Expression of Interest (EOI) from qualified agencies for undertaking Labour Statistic Survey in the District of Kohima, Nagaland. EOI document defining objective and scope of work, eligibility criteria, submission requisites etc. can be downloaded from the website: <https://labour.nagaland.gov.in>. Last date of submission of EOI is 19th November, 2024 upto 1400 hours. Sealed envelope titled "LABOUR STATISTIC" and addressed to Labour Commissioner containing EOI and non-refundable fee of ₹5000.00 by way of Pay Order/DD in favor of Labour Department, payable at Kohima, Nagaland may be submitted to the Office of the Labour Commissioner, New Secretariate Complex, Kohima. Inquiries if any may be obtained from Office or through E-mail: labcommgl@gov.in.

(Er. S.L. WATI AIER)
Labour Commissioner,
Nagaland, Kohima

Ukraine rara atemtsü atema yariteptsü renema lir: PM Modi

Moscow, Mongputeni/Oct. 22 (Agencies):

Kazan yimti nung BRICS senden alitsü lia India Ato Kilonser Narendra Modi ya Mongulbarnü Russia Tir Vladimir Putin-i pelashishia agizuka liasü. Putin-i Russia-India tesendaktep nung o meyiptür menüngdak ta ashi aser senden atema yimti semdangba asoshi PM Modi dang pelaba lemsatep.

PM Modi-ia Ukraine nung tekeratiba nung yimjung alitsü asoshi yaritsü India renema lir ta shi. Ukraine nung February 2022 nung tenzükba rara küm asem tatemleni aor.

"Asenok osangtsüsang agitepa arur. Yimjung ya tongtipang ta onoki angateter, aser yimjung lidakstsü onoki mulunger," ta Modi-i ashi.

"Aruya aliba anogotem teyari ajak agütsütsü India renema lir," ta paisa ashi.

BRICS nung tang Russia menden lir, koba nung tir ya melentepa inyaker.

BRIC nüngja ya 2001 küm Goldman Sachs chief economist Jim O'Neill-i research paper ka nung jetetsü, koba ajanga Brazil, Russia, India aser China renloktsü indang shia liasü.

Russia, India aser China mapang shia ajurutepa aru aser iba sülen Brazil inok aser ano South Africa, Egypt, Ethiopia, Iran aser United Arab Emirates linüktem anio. Saudi Arabia tang tashi maden lir.

Ato kilonseri July ita Moscow nung Putin den ajurutepba indanga shia liasü.

Asenok küm shia iba senden amenba ajanga lenla ajak nung amalitep akaba tsütsü tashi itshir, ta pai ashi.

BRICS tir ama Russia-i inyaktetba atema Modi-i Putin nem tenüngsang agütsü aser tangbo linük aika iba telok nung denner ta ashi.

Kasa mapang Ukraine Tir Volodymyr Zelensky-i Russia den yimjung ken o jembitsü ya taruba ita US tir election result dak keta lir ta ashi.

Osangbener temi pa dang Kyiv den ken o jembitsü Moscow renema alitsü asü ta asüngdang dang, "Mezungbuba nung ibai United States elections dak keta lir. Parnoki United States indang policy repranga alitsü südi ta bilemer," ta Zelensky-i langzü.

government nung Chief Adviser akum.

"Tesüiba election asem nung shilem agia aser ozüng agi memelai parliament-i arurtemi nüburtem kelakoktsü, aser interim government-i parnok yimtenren nung shilem agiba nung tetsükdkatsü agütsütsü," ta Alam-i ashi.

Yunus-i political party ter den senden ka amen, shirnoki taruba national elections nung Awami League shilem magidakstsütsü khanga liasü. January ita election agiba nung Hasina ya kümsük pezübuba atonga takok angu.

Awami League den tesendaktep alitsü südi ta züngshiba party 14 iba sensaksem nung maden ta ashir.

Elections nung party shilem magidakstsütsü atema asüngdang dang, "Sorkar kisüngi telemtetba magitsü aser

danga political party tem den shisa agitepba sülen telemtetba agütsü," ta Alam-i ashi.

Taoba ita Awami League den tokteper Bangladesh Nationalist Party aser Jamaat-e-Islami nati Hasina'er party nem tenokdangba magütsütsüla ta shia liasü.

Kaketshir temi anir longkak aitba mapang kaketshir aser nüburtem teppetba nung shilem agia lir ta tai tonglokja aliba mechi Awami League ya nokdangtsü aser registration agentsü atema writ petition agütsüba September 1 nü Dhaka High Court-i magizük.

Iba petition nung agüja aliba ken o jembir ang High Court-i iba totuyuba ya agütsü, ta Attorney General of Bangladesh Md. Asaduzzaman-i ashi.

Külen International Crimes Tribunal ajanga October 17 nü Hasina aser lar party züngsem 45 aputsü totuyuba agüja lir.

South Korea-i Ukraine nem nok-nü agütsütsü asadanger

Seoul, Mongputeni/October 22 (Agencies):

Ukraine den rara nung Moscow nem teyari agütsütsü atema sepaitem meyok ta Pyongyang-i shia arudar, ajisüaka Russia aser North Korea na military tesendaktep dak sendakba nung telangzüba agütsütsü asoshi jenjang tapet agütsü South Korea-i tenangzüba agütsüogo.

Seoul nung kettangsürtemi Mongulbarnü ashiba agi, Russia aser North Korea na tsüngda tesendaktep ya alima asoshi amokmeren ka lir aser South Korea-i, Ukraine nem prangbong injang aser hadir balala agütsütsüba densema iba linük ana anema jenjang tapet agütsü asoshi tembar linüktem den inyakteptsü.

North Korea-i Ukraine den rara nung Russia nem teyari agütsütsü atema sepai 1,500 yok ta shia aitsüba sülen South Korea-i Hombarnü Russia indang ambassador jaokogo.

Seoul-i iba taitsüba benokba ya tamendakdak maka aser olulu ka dang ta North Korea-i shiogo, saka Seoul-i Mongulbarnü iba ya magizük aser iba anema jenjang agütsü tenangzüba agütsüogo.

"Russia nungeri ozüng alema Ukraine amakba nung teyari agütsütsü atema sepaitem yokba ya ozü linük atema dang masü saka alima kintem atema amokmeren ka lir," ta National Security Council-i ashi.

"North Korea nunger sepaitem yokba sülen sorkari shilem balala küma lemsar iba anema jenjang tapet agütsü," ya kasa sangdong ajanga metedaktsü.

Tir Yoon Suk-yeol indang office nungi kettangsür tejen kati ashiba agi, diplomatic, rongsenketzung aser military dak sendakba nung jenjang agütsü atema renemdar. Paisa, South Korea-i taoba mapang

Kyiv-i sepaitem meyoktsü atema telemtetba agiba asadangshitsü akok, ta ashi.

Ukraine nem prangbong injang aser hadir balala agütsütsü atema anüolen aliba linük kar aser Kyiv-i Seoul nongshia arudar, saka parnoki tang tashi nungbo tanga teyari balala dang agüja arudar.

"Jenjang balala agiba nung shilem ka ama onoki defence atema prangbong injang aser hadirtem yoktsü asadangtsü akok, aser parnoki talila inyaksangshira onoki Russia amaktsü atema amshitsü asoshi prangbong injang aser hadirtem agütsütsü asadangtsü akok," ta kettangsüri osangbenertem dang ashi.

Ita ishika tsüngda Russia nunger sepaitem nem prangbong injang aser hadir balala agütsüogo ta shia South aser United States nati North Korea aitsüba parnoki magizuki arudar.

(Maneni tapak 8 nung...)

Job Role	Training Hours/Duration	Eligibility	Training Centre Location
Drone Service Technician	300 hours/ 60 days	1) 15 - 45 years 2) Class 12th pass	Kohima

- Enrolment shall be done on first come first basis.
- Last date for submission of form: **28th October 2024**.

For Forms visit: NAGABOTS office
Flat No. 103, 1st Floor, Mabel Tanquist Memorial Building, Neitou Rd, above NCC Office, Kohima.
OR
Eligible candidates may also visit www.nagabots.net to register
SCAN the QR CODE
For Queries Contact : (Week days: 10:00am – 4:00pm)
7628014156/ 9366594691
NB : Aadhaar should be linked to phone number.

**Sd/-
Director
Youth Resources & Sports
Nagaland: Kohima**

SANGDONGER

Chuchuiyimpang Mongoya Prayer Garden nung 25th – 27th October, 2024, anogo asem (3), Healing Crusade sentong agütsü renema lir. Anungji nübur shirnok shi aser Taneli nung tanepütsü aginüa ali, temulunger ajak arua iba sentong nung Tsüngremer temoatsü agütsü pelashishia jaoker.

---- Mapang telesma ----
Aonung – 5:00 PM; Anepdang – 9:00 A.M
Tongtepratepdak : 9856486841 / 8258802047

40 BUBA DIMAPUR DISTRICT AO PENSIONER'S TELUNGJEM KÜM TATEM LOKTI SENDEN SENDONG

Anogo Mapang	: 26th October 2024
Tesentepdak	: 10:00 Am nungi
	: Mr. & Mrs. Lepzük Jamir
	DDAPT Kimen, Kevijau Colony, Dimapur (Near Livingstone Hr. Sec. School, Dimapur)
1. Menden	: Ketdangpurtem
2. Sarasademtsü	: Wt. Sungjemla, Kevijau Colony
3. Tesenteper pelaa agizükba aser Tasür biletetba	: President, DDAPT
4. Tajungshi O	: Wb. N. Lmti Longkimer Rtd. Joint Secretary, Nagaland
5. Osangtem agütsü	1. General Secretary 2. Audit 3. Nominating Committee
6. O lemtepba mapang	:
7. Nüngdak Mapang	:
8. Menden tatem O	:
9. Tatem sarasadem	: Telok

Temetetsü:

- Küm tatem lokti senden sentong tsüngdeng malemer saka Tir Yimyim aser Nagaland post nung adoktsür, Ajak medema arua atentsü ayongzüker.
- Agenda lira sentongmetenzükang ketdangpur ket tongtsütsü mepishir.
- Sentong temer Chiyungba mapang alitsü.
- Iba sentong asoshi ajaki sarasadema atadi.

Sanen Luden, DDAPT

DEEDS FOR GOVERNMENT EMPLOYMENT EMPLOYEE FOR CHANGE OF NAME/SURNAME AND TRIBE IN THE SERVICE BOOK

BY THIS DEED I the undersigned **Tongpang Longkumer** lately called **Tongpang** employed as UDA under School Education hereby:-

- Wholly renounce**, relinquish and abandon on the use of my former name of **Tongpang** and in place thereof do assume from the date thereof the name of **Tongpang Longkumer** and so that I may hereafter be called, known and distinguished not by my former name of Tongpang but by my assigned name of Tongpang Longkumer.
- For the purpose of evidencing such my determination, declare that i shall at all times hereafter in all records, deeds any writings and in all proceedings, dealings and transactions private as well as public and upon all occasions whatsoever use and sign the name of **Tongpang Longkumer** as my name in place of and in substitution for my former name of **Tongpang**.
- Expressly authorizes and request at all person at all times hereafter to designate and address me by such assumed name of **Tongpang Longkumer**.
- In witness whereof I here unto subscribed my former and adopted name of **Tongpang** and **Tongpang Longkumer** affixed my seal this 21st day of October, 2024

Old Signature

New Signature

Signed and delivered by the above:-

Named **Tongpang Longkumer** formerly **Tongpang** in the presence of:-

Regd. No. 187/2024

Date 21/10/24

Chief Judicial Magistrate

Mokokchung : Nagaland

Chief Judicial Magistrate
Mokokchung : Nagaland

Glasgow CG nung hockey, shooting, wrestling, cricket, badminton masayatsü

Mongputeni/October 22, lir. CWG tatemabuba ya support staff tem hotel tem nung anendaktsü, ta kasa sangdong ajanga metedaktsü.

2024 (Agencies): Senotsü tali mintoktsü atema 2026 Commonwealth Games nung asaya 10 dang asayatsü telemetba agiogo.

Hockey, badminton, shooting, wrestling amala asayatem kong India nunger asayartemi CWG nung teti medal ngua arudar, item asayatem Glasgow nung taruba asayamung nung masayatsü.

Iba asayamung 23buba ya July 23 nungi August 2 tashi Glasgow nung asayatsü renema lir. 2014 küm iba asayamung ya Glasgow nung asaya liasü.

Cricket, table tennis, squash, road racing, squash nunger iba asayamung nung masayatsü, koba venue pezü nung dang asayatsü tebilemba

densema lir. Asayartem aser support staff tem hotel tem nung anendaktsü, ta kasa sangdong ajanga metedaktsü.

Item asayatem aginba ajanga India nunger asoshi medal angutsü timla aliba samaogo, kechiyong India nunger asayatemi taoba mapang item asayatem nung teti medal ngua aruogo. Küm pezü tejakdang Birmingham nung asayaba mapang shooting asaya mezüngoksema sülen taruba asayamung nunga iba asaya züngoksemtsübo imla maliasü.

Glasgow nung asayamung asayatsü aliba indang sangdongba mapang CGF-i ashiba agi, Glasgow 2026 nung asaya 10 mile ti telongtet nung venue pezü nung asayatsü.

Taoba mapang Uruguay nunger striker Forlan professional tennis asayatsü

Mongputeni/October 22, 2024 (Agencies): Taoba mapang Uruguay nunger nüntugu football asayar Diego Forlan, shiba Manchester United aser Atletico Madrid amala club tajungtem nungi kanga takok ngua asayaogo, pa November ita taruba Uruguay Open tennis tournament nung asayatsü renema lir, ta asayamung ayongertemi Mongolbarnü metedaktsü.

Arishi küm 45 tain asayar shibai Uruguay team 2010 küm World Cup semi-final tonga asayaba mapang tongtibang shilem agia liasü, pa 2018 küm football asaya nungi anenba sülen tennis asaya arudar.

Forlan ya tablen kayim asayar ka lir aser pa nem Montevideo nung iba clay court Challenger Tour event main draw nung asayatsü atema wild card entry agütsüogo aser pa Argentina nunger asayar Federico Coria den külemei asayatsü, shiba tang world rankings nung jenjang 101buba nung lir. Iba asayamung ya November 11 nungi 17 tashi asayatsü renema lir.

Asayamung ayongertemi tennis asaya nung Forlan idang asayaba mapang Premier League dena kokogo.

Taoba mapang striker, shibai Uruguay team nungi 112 ben asayaba mapang goal 36 idakja liasü, pa taküm tennis asaya nunga kanga junga shilem agia arudar.

"Forlan taküm Montevideo nung +40 asayamung asem dak tema nung asayaogo aser Lima nung ITF World Tennis Masters Tour, MT1000 nunga kanga junga shilem agiogo," ta asayamung ayongertemi metedaktsü.

Forlan football asaya aliba mapang pa Villarreal aser Inter Milan nungia asayaogo aser Manchester United nungi asayaba mapang Premier League dena kokogo.

Naomi Osaka yiruba ajanga season tembang masayatetsü



Tokyo, Mongputeni/ October 22 (Agencies):

Naomi Osaka-i sangdong ka ajanga la yiruba ajanga taruba ita Billie Jean King Cup finals nung masayatetsü ta ashiba sülen la taküm joko ojang dang asayatetsü.

Grand Slam kija asaya pezü koker alila-i Deobarnü Tokyo nung ashiba agi, la abdominal muscles raksago.

"Ni teberem atsu asütsü ta bilem saka Beijing nung MRI ka agiba sülen parnoki ashiba agi, ni teberem yiruba den abdominal muscles raksago," ta arishi küm 27 taina sayar yagi ashiba Kyodo News agency sangdong ka ajanga metedaktsü.

Iba ita tetenzüklen China Open round of 16 nungi Coco Gauff den asayaba mapang asaya tom nung yirur masayatetsüsa akumba sülen Osaka tang tashi khen danga asaya mali.

La Osaka nung Japan Open nunga masayatsü telemetba agi aser iba hopta Tokyo nung Pan Pacific Open nunga masaya. Billie Jean King Cup finals ya la asoshi taküm küm asayamung tatembangbuba asütsü liasü.

2023 küm July ita jala Shai soa bentsüba sülen la January ita nungi asaya tenzükshi saka junga masayateti aruogo.

La asaya tenzükshiba sülen asayamung ana nung dang quarter-final tonga asayateta lir.

BENDANGLI OSANG : Tapak 7 nungi... South Korea-i Ukraine nem nok-nü...

South Korea indang spy agency-i, Ukraine-i yoktsü atema renemshitsü asoshi Russia anütokleni North Korea-i special forces personnel tem yokogo ta ashiba parnoki Hombarnü magizüki liasü.

"Russia den military tesendaktep dak sendakba nung tamendakdak makaba olulu osang dak sendakba nung onoki kecha telangzüba agütsütsü nüngdak madoker," ta North Korea nunger ketdangsür kati UN General Assembly mapang committee senden ka nung shia liasü.

Ketdangsürisa, Seoul-i onok aitsüba ya North Korea tenüng menüksütsü atema

aser linük ana tsüngda tesendaktep tajung aliba raksatsütsü asoshi merangba ka lir, ta ashi.

Pyongyang-i sepaitem yokba indang Russia-i kecha telangzüba magütsü, saka North den military tesendaktep tajung aliba indang lemsatepogo ashiba agi, iba tesendaktep ya South Korea indang security tejangraba anema inyaktsü asoshi masü, ta shiogo.

Pyongyang aser Moscow na North Korea nguteba mapang nungi tesendaktep tajung lir aser Russia-i Ukraine amak tenzükba sülen nungi tesendaktep tali akangshio.

BILEMDANGANG "Tangari sentoka metoktsütettsüsa tajung dang inyakang."

Team Gilgal telok MDFA Semi Final nung asayatsü jenjang ajangzüktetogo



MDFA Trophy 2024 mezünguba quarter finals Team Gilgal aser Zonipang S.A tsüngda asayadang tangokba noksa.

Mokokchung, October/ Mongputeni 22(TYO): MDFA Trophy 2024 mezünguba quarter finals tanu Team Gilgal aser Zonipang S.A tsüngda asayaogo. Tanu iba sentong nungya Match Patron Wb.Logubo NSU Dy.SP(R) Mokokchung liasü.

Asaya tenzüker minute 18 buba nung Team Gilgal telok nungi J.no-8 Pangei Konyak-i goal-1 yok aser parnok takoklen sur anisüngzükba mapang agi.

Anisüngzükba mapang agir tanaben ground-i aita asayadang Team Gilgal telokia goal-1 lagi asuyonga koknua asaya aser ano Zonipang S.A

teloki goal-1 jibo küptoker ano talila goal yoka koknua asaya saka mapang talangka asayar kelen Team Gilgal telok nungi J.no-8 Pangei Konyak-i minute 90+5 nung goal-1 yoktet aser iba sülen asaya tatembanglak nung Zonipang S.A telok nungia Moachang-ia minute 90+6 nung goal-1 yok saka iba asaya Team Gilgal teloki goal 2-1 agi Zonipang S.A telok kokteta Team Gilgal pur MDFA Semi Finals nung asayatsü jenjang ajangzüktetogo.

Iba asaya nung telok anapronglai takok angutsü meranga asayatepba mapang Team Gilgal telok nungi J.no-20 Hivika Zhimo, J.no-8 Pangei

konyak, J.no-3 Tongpangnunghsi aser J.no-13 imnazülu par pezü Yellow Card achi aser ano Zonipang S.A telok nungia J.no-8 Nungshisashi aser J.no-17 Temsuyanger tena Yello Card achi.

MDFA TROPHY 2024
Fueling Passion Inspiring Dreams

2nd Quarter Final Match
DATE: 23rd OCT. 2024 TIME: 1:00PM
MATCH PATRON
Shri. Imtiyapang
COUNCILLOR MMC
INTRODUCTION OF PLAYERS
NU LUMAMI VS KSUM